

La corse par tutelâ il furlan no si ferme

Il Plan gjenerâl di politiche linguistiche 2021-2025 al è stât presentât te Tierce Conference Regjonâl pe Lenghe Furlane.

Favorî la trasmission de lenghe furlane tra lis gjenerazions, miorâ il nivel cualitatîf des competencis, incressi l'ûs sociâl dal furlan. A son chescj i macro obietîfs dal "Plan gjenerâl di politiche linguistiche 2021-2025" pe lenghe furlane che al è stât presentât ai 5 di Novembar stât, in ocasion de tierce Conference Regjonâl pe Lenghe Furlane, organizade dal Consei regjonâl dal Friûl - Vignesie Julie e de ARLeF - Agenzie Regjonâl pe Lenghe Furlane.

Un event fat in presince, inte sede de Regjon F-VJ a Udin, là che dut cås a àn podût partecipâ i furlans

di ogni bande dal mont midiant de direte streaming. Cjapâ dentri dute la comunitât furlanofone, di fat, al è un passaç fundamentâl se si ten cont di trop che lis politichis linguistiche a travanin ducj i ambits de vite sociâl. «O vin podût descrivi ben il strument che al permetarà di segnâ lis liniis vuide de politiche linguistiche pal avignî», al à marcât **Eros Cisilino**, president de ARLeF.

Il Plan gjenerâl al da indicazions pes



Il president de ARLeF, Eros Cisilino

misuris di planificazion linguistiche su la fonde di une teorie dal program za studiade e proponude in altris contescj europeans, che e puartarà a incressi in maniere progressive lis ativitâts in lenghe minoritarie.

De scuele aes gnovis tecnologjiis: si fevelarà simpri di plui par furlan



Il President dal Consei regjonâl, Piero Mauro Zanin

Il PGjPL 21-25 al jentre intal merit di ogni ambit de vite sociâl, tacant di un dai aspjets plui impuartants pe vite di ducj, o ben la scuele e, plui in gjenerâl, la formazion.

Chê metude in vore e sarà une azion a 360 grâts, tacant dai struments didatics e informatics pal insegnament dal furlan, che a saran di implementâ. Lu à sclarît,

dilunc de Conference, **Ketty Segatti**, vice direttore de Direzion centrâl lavôr, formazion, istruzion e famee. Altri cjapitul al è chel di Docuscuele: il Centri di documentazion, ricercje e sperimentazion didatiche al varà di diventâ un pont di riferiment. Ma si intervignarà ancje su la formazion dai insegnants. Dut al sarà sostignût di campagnis di comunicazion par sensibilizâ docents e fameis. In fin, e je previodude la realizazion di progjets europeans e internazionâi pal disvilup di une educazion plurilengâl.

Propit su la impuartance de scuele, il president dal Consei regjonâl dal F-VJ **Piero Mauro Zanin** al à marcât: „Di cheste tierce Conference e ven fûr une vision dal furlan tant che lenghe dal avignî e no dome dal passât. Par chest si varà prin di dut di rindi obligatori il so insegnament a scuele.” Tornant ai struments informatics, la lôr implementazion vuê e je une sielte obleade che e covente a ducj i nivei. In graciis dai gnûfs mieçs a disposizion, si ponte a fâ doprâ di plui il furlan, cemût che al à sclarît il consulent **Alberto Masini**.



Fevelâ par furlan par sintîsi simpri a cjase, dapardut, tal mont

Al è intervignût ancje il president di Ente Friuli nel Mondo, **Loris Basso**, intant de Tierce Conference, marcant prin di dut cemût che dilunc dal incuintri a fossin fintremai 66 i Paîs colegâts, di indulà che i furlans a jerin «daûr a scoltâ cheste conference». Cjapant la peraule, Basso al à domandât «di vê atenzion pai tancj coregjonâi intal mont». Di fat, a son simpri di plui, massime fra lis gjenerazions zovinis, chei che a vuelin imparâ la lenghe furlane e fevelâlê intes lôr cjasis.

